

Chamamento do Partido Galego Social Democrata

Un grupo de demócratas galegos, conscientes da actual situación na España, fondamente preocupados polo porvir político de Galicia, a fin de conquistar a máis pronta instauración da Democracia, que se ten de facer a través das canles axeitadas existentes nos reximes democráticos, como é o dereito à asociación política en forma de partidos políticos, acordamos o promover a constitución do PARTIDO GALEGO SOCIAL DEMOCRATA en base ás liñas programáticas contidas neste primeiro comunicado.

Facemos un chamamento a todos os galegos demandando a súa participación política para a implantación da Democracia, por meio desta Declaración sobre o programa que definirá a acción do PARTIDO GALEGO SOCIAL DEMOCRATA.

GALEGO, porque é um Partido político esencialmente enraizado na realidade de Galicia, autónomo e que tentará a promoción integral dos dereitos da Comunidade galega, coa finalidade de conquistar a autodeterminación político-administrativa, económica e cultural fronte ao sistema centralista que a mantén nunha situación de verdadeiro colonialismo interior político, económico e cultural.

A autonomía do Partido, porén, non exclúe a posibilidade de establecer pactos coas demais forzas políticas da España para a instauración da Democracia.

SOCIAL, porque tenderá a unha socialización progresiva, baixo a inspiración dun socialismo humanista, personalista e comunitario, dentro dunha evolución da actual situación a formas sociais máis axeitadas á estrutura da nosa Terra.

DEMOCRATA, porque promoverá como fins primeiros da súa actuación a mobilización social do pobo galego e a creación dunha conciencia de galegitude, dentro dunha liña aberta á confrontación de todas as ideas e opinións, por meio de actividades que permitan ao propio Partido o formular sucesivas instancias críticas sobre a realidade económico-social e cultural galega, procurando por todos os medios ao seu alcance o cordinar os esforzos para a implantación da Democracia e das liberdades persoais e dos dereitos contidos na **Declaración Universal dos Dereitos Humanos** e nos **Pactos internacionais dos Dereitos civís e políticos, económicos, sociais e culturais da ONU** e na **Convención dos Dereitos Humanos e Liberdades fundamentais** e a **Carta Social** europeas.

O PARTIDO GALEGO SOCIAL DEMOCRATA considera como pasos previos para a instauración dun rexime democrático xusto:

1. O pleno recoñecimento da libre autodeterminación de Galicia.
2. A administración polo país galego dos seus recursos propios, coa planificación e control exertido dos mesmos, que aseguren o desenvolvemento integral da Comunidade, tendo en conta a incidencia do proceso industrializador no meio ambiente e humano, conforme a criterios democráticos e sociais.
3. A organización administrativa de Galicia estruturada sobre as unidades de país, comarca e parroquia, dacordo coa súa realidade sociolóxica.
4. O recoñecimento do idioma galego cos mesmos dereitos do que a lingua oficial do Estado.
5. A reforma estrutural das economías agraria e mariñeira, con formas concretas de socialización da propiedade, explotación dos bens comunitarios (montes de veciños, zonas marisqueiras) e fomento de actividades cooperativas.
6. A regulación da empresa privada e pública, garantizando a seguridade da permanencia nos postos de traballo, a intervención dos traballadores na empresa e o seu control social e democrático, con prevalencia dos intereses comunitarios.
7. O dereito á sindicación das clases traballadoras para a defensa dos seus intereses económicos e profesionais e o recoñecimento da folga como camiño válido para conquistar as reivindicacións laborais.
8. A planificación vinculante da vivenda dentro de criterios urbanísticos e sociais de construción, concordes coa realidade galega, que impidan especulación.
9. A seguridade xurídica para os dereitos do cidadán e a garantía para o exercicio dos dereitos políticos de expresión, asociación e reunión.
10. A igualdade xurídica da muller galega diante a lei e a sociedade.
11. A abolición da pena de morte.
12. A programación democrática do ensino dacordo coas características específicas culturais de Galicia, seguindo os criterios dunha educación liberadora, con instrución obrigatoria no idioma galego concorde coa realidade bilingüe de Galicia, nos establecementos tanto públicos canto privados de ensino.
13. O control democrático dos medios de comunicación social, cunha programación educativa dirixida ao pobo e os seus intereses, escluindo toda discriminación política, relixiosa e cultural.
14. O establecemento dun sistema fiscal axeitado a criterios de xusticia distributiva e control democrático.

O PARTIDO GALEGO SOCIAL DEMOCRATA propugna o federalismo a escala peninsular e a integración na Europa, como unha das maiores garantías para a conservación e desenvolvemento da Democracia.

O PARTIDO GALEGO SOCIAL DEMOCRATA, aberto a todas as tendencias democráticas que crean en fórmulas de socialización progresiva, há pór a debate público oportunamente as súas liñas programáticas como o mellor xeito de organizar unha convivencia social libre, pacífica e xusta.